



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

28 Juñu 2018

Governu Konstitusionál Dawaluk tenke asegura no promove governasaun diak

Governu Konstitusionál dawaluk tenke asegura “governasaun-diak” no “governasaun ne’ebé moos” nu’udar kumprimisiu eleitorál ne’ebé partidu polítiku hotu-hotu kompremitidu atu promove iha sira nia governasaun bainhira sira kaer ukun.

Elementu xave ida hosi governasaun ne’ebé diak no moos mak kredibilidade no integridade hosi servidor públiku sira ne’ebé sei asumi kargu/pozisaun hirak ne’e. Ida-ne’e sei hametin konfiansa públiku ba instituisaun estadu sira, no sei hasae kualidade prestasaun servisu públiku no sei lori povu ba moris-diak.

JSMP akompaña ho kuidadu debate no kritíka sira relasiona ho desizaun Prezidente Repúblika, Dr. Francisco Guterres, Lu-Olo, ne’ebé husu ba Premeriu Ministru Governu Konstitusionál VIII, Taur Matan Ruak, atu konsidera fali kandidatu membru governu balun ne’ebé la konsege hola parte iha seremonia simu pose iha 22 Juñu 2018, tanba sira balun nia prosesu la’o hela ka iha prosesu justisa nia-laran.

Desizaun ne’e hamosu pro-kontra no diskusaun kritíku iha públiku, partikularmente polítiku-sira tanba antes ne’e iha Setímu Governu Konstitusionál Prezidente-Repúblika la ezerse nia kompeténsia atu fiskaliza ka verifika lista ba membru governu antes simu pose.

“Embora desizaun ne’e kontroversiál maibé ida-ne’e nu’udar pasu ida-ne’ebé avansu no progresivu teb-tebes tanba Prezidente manifesta ninia jestu polítiku atu transmite preukupasaun públiku katak estadu presiza duni servidor sira ne’ebé livre hosi alegasaun krimínal atu asegura kredibilidade no integridade instituisaun estadu sira, dehan Diretór Ezekutivu JSMP, Luis de Oliveira Sampaio.

“Mesmu nune’e, Prezidente-Repúblika mós tenke asegura katak desizaun ne’e la prejudika prinsipiu prezumsaun ba inosente ne’ebé kongsagra iha Konsituisaun no Konvensaun Direitu Sivíl Polítiku ne’ebé estadu ratifika ona hanesan norma no prinsipiu báziku no universal ne’ebé estadu demokrátiku sira tenke tane aas iha prátika,” nia hatutan.

JSMP fiar katak debate, pró-kontra no observaun sira ne’e representa natureza no âmbito estadu no sociedade demokrátiku, maibé ita hotu tenke konsiente hodi konsentra esforsu tomak atu promove governasaun diak nu’udar komprimisiu no komitmentu kolektivu elementu sociedade

hotu-hotu. Tanba ne'e figura sira ne'ebé asumi kargu públiku sira tenke figura sira ne'ebé iha pasajem istória profesionál (*track record*) ne'ebé diak, nune'e sei hetan lejitimidade no autóridade polítiku hodi maneija no dirije instituisaun save sira iha governu konstitusionál dawaluk durante nia mandatu. Ida-ne'e mós diak ba estabilidade governativa tanba wainhira kaer hela knaar mak tribunál sira notifika figura sira ne'e atu ba hatan iha tribunál, ida-ne'e mós sei prejudika ezisténsia no funsionamentu governu atuál.

Jestu polítika Prezidente-Repúblika representa preokupasaun públiku durante ne'e, liu-liu dezafiu no difikulidade sira ne'ebé setór justisa enfrenta atu lori membru governu no deputadu ativu sira hodi kolabora ho justisa.

Nu'udar saida mak subliña iha komunikadu imprensa Kaza-Sivíl Prezidencia Repúblika ne'ebé sirkula ba públiku iha 27 Juñu 2018, ho referénsia ba artigu 113 Konstituisaun-Repúblika kona-ba membru governu ne'ebé hatan kona-ba kazu krime, Prezidente-Repúblika husu atu konsidera fali lista sira ne'ebé propoin halo parte iha membru Governu Konstitusionál da-VIII nian.

JSMP observa katak tribunál sira dalarabak enfreta dezafiu no lakon tempu no rekursu barak atu hetan kolaborasaun hosi membru governu no deputadu ativu sira ne'ebé simu notifikasaun atu partisipa iha audensia tanba kestaun intrepretasaun ba imunidade ne'ebé la klaru no ámbigu.

Tanba ne'e JSMP husu ba Governu Konstitusionál Dawaluk no Deputadu Lejislatura Dalimak atu dezenvolve matadalan ida kona-ba oinsa atu uja imunidade iha prátika no evita konfuzsaun sira iha prátika.

JSMP rekomenda ba parte sira ne'ebé iha objesaun ba pozisaun Prezidente da Repúblia ne'e, atu lori ba Tribunál Supremu Justisa hodi hakotu polémika ne'e.

Atu hetan informasaun liutan bele kontaktu:

Luis de Oliveira Sampaio

Diretór Ezekutivu JSMP

Email: luis@jsmp.tl

www.jsmp.tl